



Cun en concert da vaglia ò i gl Chor viril Surses do ena degna finiziun alla Festa svizra da cant.



Dirigent e parsoura digl Chor viril Surses Luzius Hassler e Pauli Dosch durant igl termin da fotografias (da san.).

Igls noss chors dastgan sa mussar

Festa da cant svizra

DA GION NUTEGN STGIER / ANR

■ **La Festa da cant federala 2008 totga agl passo. 495 chors èn sa preschentos agls experts. 73 gedas on igls experts do igl predicat «excellent». Otg da chels on er survagnia chors grischuns. Retus Giger, igl parsoura dall'Unìun da cant cantunala, è cuntaint cun la prestaziun digls chors grischuns.** An preschientscha da cunsigliera federala *Eveline Widmer-Schlumpf* è cida a fegn dumengia passada la Festa svizra da cant a Weinfelden. La vistea dalla magistrata è stada egn digls puncts culminonts dalla festa tgi è stada durant dus fegns d'emda. Er mess accents on pero la davosa fegn d'emda igl Chor viril Surses ed igl Chor da giuvenils grischun inclus igl Chor da giuvenils svizzer cun igls treis concerts da festa. Digls 21 chors grischuns tgi èn sa preschentos agls experts eran gist 11 digl intsches rumantsch.

Otg gedas «excellent»

73 chors on persvadia igls experts schi fitg tgi els on gist do igl pi ot predicat pussebel. Da chel dumber èn otg chors digl Grischun e siva dalla davosa fegn d'emda togtan er igl Chor viril Surses, igl Chor viril Igis ed igl Chor da giuvenils grischun tar chels chors tgi dastgan esser loschs. Pero menziunos seian er igls chors pi pitschens tgi èn stos a Weinfelden e contribuia blier

per la bela festa tgi resta anc dei an regurdientscha. Passa 15 000 cantadours/as e madem blier visitaders on galdia la hospitalitad generosa e l'organisaziun excellenta a Weinfelden. Anfignen 70 cars u bus per de purtavan igls cantadours/as alla festa e 31 experts on piglia igls chors sot la marella. 1000 voluntaris on procurò tgi la famiglia da cant svizra sa catta bagn aint igl martgea cun 9000 abitants.

Treis cantuns tranter igls miglers

40% digls chors grischuns on ratschet igl predicat igl pi ot. En fatg plaschevel per *Retus Giger*, igl parsoura dall'Unìun da cant cantunala. Chella bilantscha positiva vegian betg tot igls cantuns pudia far ossa tgi la festa totga agl passo. Tignia pitg agls chors grischuns cuagl predicat igl pi ot on surtot igls chors digl cantun Friburg e digl cantun Vad. Retus Giger ò managea tgi aint igl Grischun davigl anc ulteriours chors tgi vessan sainz'oter gia igl potenzial da survagneir en «excellent» schi fissan stos dalla parteida a Weinfelden. Losch è el pero er digls chors da noss cantun tgi on procurò per entusiassem cun lour concerts da festa. Da menziunar seia cò er tgi agl concert digl Chor da giuvenils svizzer ò *Clau Scherrer* do la dretga noda cun star chel sot la batgetta digl Sursilvan.

La sala ple tgi fullanada

31 chors on gia l'onour da dar alla festa

la dretga noda cun en concert da gala. Er treis chors grischuns on procurò cun cant igl pi fegn tgi igl auditori è sto perdetga sen tge nivel ot tgi igl cant è an Svizra. Igl chor Ligia Grischa ò do l'antschatta agls concerts da gala ed igl Chor viril Surses è sto egn da chels chors tgi ò concludia igls concerts da festa. Venderde passo ò dantant er igl Chor da giuvenils grischun musso tge potenzial da cantadours/as giovens tgi è avantmang aint igl cantun. Quant a cor tgi igl auditori ò igl cant rumantsch ò vasaia sonda passada igl Chor viril Surses tar igl concert aint igl «Rathaus» a Weinfelden. Gio dei avant igl concert davigl strousch en plaz liber ed igls Surmirans tgi stattan alla Bassa èn rivos an rotschas. *Luzius Hassler*, igl dirigent premuro digl Chor viril Surses, veva tscherna en program scu fatg per en concert da festa. Lantschatta ò igl chor fatg cun tschintg canzungs tradiziunales e surtot «La baselgia veglia da Lantsch» e «Return» procurò tgi a l'egna u l'otra persunga è gist nia pel gagligna. Igl toc da mez ò igl chor dedigtia agl «Mond digl paster pitschen» tgi igl chor ò canto a caschung digl giubilum da 100 onns. Concludia ò igl chor igl concert da vaglia cuagl grond hit actual «Surses» e gist mess igl punct sen igl i agl concert tgi è sto ple tgi angal reclama per noss chors rumantschs.



Dus Sursilvans tgi en stos er la davosa fegn d'emda alla festa èn Markus Zarn, dirigent digl Chor viril Falera ed anteriour dirigent digl Chor viril Lumnezia ed Ernst Collenberg, igl anteriour president dall'Unìun da cant cantunala (da san.).



Igl tetel da chella canzung è scu fatg per igls chors digl Grischun ed er digls oters cantuns, cun aver gia cantadours/as muments da legreia a Weinfelden.



Igls commembers digl Chor viril Surses dereivan da tot las vischnancas dalla Val e da Beiva èn chegl Othmar Jäger, Aldo Fasciati e Dino Rogantini (da san.).

FOTOS G. N. STGIER



Dastga esser cuntaint cun la prestaziun digls chors grischuns a Weinfelden: Retus Giger, igl parsoura dalla Unìun da cant grischuna.